

摘藻堂四庫全書薈要

集部

欽定四庫全書薈要卷二萬九十

元文類卷七

元 蘇天爵 編

七言律詩

聞擣衣

趙孟頫

露下碧梧秋滿天
砧聲不斷思綿綿
北來風俗猶存古
南度衣冠不及前
苜蓿總肥宛騷裏
琵琶曾泣漢嬋娟
人間俯仰成今昔
何待他年始惘然

溪上

趙孟頫

溪上東風吹柳花
溪頭春水淨無沙
白鷗自信無機事
元鳥猶知有歲華
錦纜牙檣非昨夢
鳳笙龍管是誰家
令人苦憶東陵子
擬問園田學種瓜

道場山

趙孟頫

絕頂清秋淩翠烟
登臨應費酒如川
平生能著幾兩屐
負郭何須二頃田
初日出雲光射地
雙溪入湖波接天
升高望遠我所愛
青壁有路何當緣

蛾眉亭

趙孟頫

天門日湧大江來，牛渚風生萬壑哀。
青眼故人攜酒共，兩眉今日為君開。
蒼崖直下蛟龍吼，白浪橫空鵝鷺迴。
南望青山懷李白，沙頭官渡苦相催。

多景樓

趙孟頫

層巔閣幾時修，繞檻長江萬古流。
白露已零秋草綠，斜陽雖好暮雲稠。
平南籌策張華得，治內人才葛亮優。
景物未窮登覽興，角聲孤起覓城秋。

雨華臺

因至故人
劉叔亮墓

趙孟頫

雨華臺上看晴空萬里風烟入望中
人物車書南北混江山襟帶古今同
昆蟲未蟄霜先實鳳鳥不鳴江自東
綠髮劉伶綠醉死往尋荒冢酹西風

過岳王墓

趙孟頫

鄂王墳上草離離秋日荒涼石獸危
南渡君臣輕社稷中原父老望旌旗
英雄已死何嗟及天下中分遂不支
莫向西湖歌此曲水光山色不勝悲

錢塘懷古

趙孟頫

東南都會帝王州三月鶯花非舊游故國金人泣辭漢
當年玉馬去朝周湖山靡靡今猶在江水悠悠只自流
千古興亡盡如此春風麥秀使人悲

海子即事

趙孟頫

白水青林引興多紅裙翠黛奈愁何底從暮醉兼朝醉
聊復長歌更短歌輕燕受風迎落絮老魚吹浪動新荷
餘杭溪上扁舟好何日歸休理釣蓑

弁山佑聖宮次孟君復韻

趙孟頫

意行騎馬到林間
晴霧都沉遠近山
瓊樹著花春自早
翠禽雙語意相關
一杯到手先成醉
萬事無心觸處閒
猶欠抱琴來託宿
靜中規寫水潺潺

城南山堂

趙孟頫

手種青松一萬栽
草堂猶在翠屏隈
推窗綠樹排簷入
臨水紅桃對鏡開
春雉雖迎朝日出
暝禽啼傍夕陽來
山妻也有幽棲意
數日遲留不肯迴

春日言懷

趙孟頫

點點飛花欲送春
萋萋芳草政愁人
黃蜂釀蜜經營急
紫燕銜泥來去頻
才似茂陵非晚遇
美如曲逆不長貧
久知求富都無益
但喜論詩若有神

紀舊游

趙孟頫

二月江南鶯亂飛
雜花開樹柳依依
落紅無數迷歌扇
嫩綠多情妬舞衣
金鴨焚香川上暝
畫船撈鼓月中歸
如今寂寞東風裏
把酒無言對夕暉

東陽八詠樓

趙孟頫

山城秋色靜朝暉極目登臨未擬歸羽士曾聞遼鶴語
征人又見塞鴻飛西流二水玻璃合南去千峯紫翠圍
如此山川良不惡休文何事不勝衣

贈周景遠田師孟

趙孟頫

與子同客帝王州一日不見如三秋風高氣肅鴈聲急
天晴日暖蛛絲游籬下黃花為誰好水邊紅樹令人愁
世間萬事可撥遣日日痛飲醉即休

金陵懷古

趙孟頫

銅雀春深漢苑空
邯鄲月冷照秦宮
煙花樓閣西風裏
錦繡湖山落照中
河水南來非禹迹
冀方北去有唐風
溪城秋色催遲暮
愁對黃雲沒斷鴻

和周待制朝迴詩韻

袁桷

雉尾高張擁玉皇
彤庭金榜粲明光
舞階飛絮呈滕六
執銳傳臚轉阿香
珠帽簫聲雙窈窕
翠旌雲影互方洋
侍臣誰近前階立
願紀堯年化日長

蛾眉班肅整皇皇怡匝松陰漏午光舞翻當軒催進酒
表函登陞促傳香六龍捧御雲中日三象輪琛嶺外洋
欲識兩宮清淨理薰風殿角漏初長

無題次伯庸韻

袁 楠

金縷歌殘月滿江玉顏曾憶侍油幢象床雲重恩專一
鯨錦波翻賜疊雙春淺正宜羶作幕夜涼深恨魀為窻
浣紗可是無靈匹側足寒溪濺石淙

翠簾匝匝護朱光千葉官桃滿院香閨苑有鸞通尺素

靈橋無鵲寄流黃上林賦罷歸巴蜀興慶詞工謫夜郎
不是月中親度曲世人那解聽霓裳

相期來似石城潮日望晴虹結綵橋却月眉愁歌漸遠
淩波步近意非遙抽琴有恨迴清角疊袖無塵轉綠腰
弄玉最憐隨鳳去秋來誰與伴吹簫

白髮詞臣兩耳垂華腴堆笏陋牛墜宮娥引燭催麻日
院吏傳更寫制時蠟然化生秋夕賜翠標疊勝歲華移
低頭欲說唐朝舊願侍虛皇進玉卮

奉題延祐宸翰

鄧文原

欽惟仁宗上承祖武蒐羅俊彥求治靡寧尤尊禮儒臣
務敦風化由是治書侍御史臣郭貫擢禮部尚書凡在
選者六人惟貫進秩有加親灑宸翰昭示龍光忝備臣
僚咸增鼓舞集賢直學士臣鄧文原謹拜手稽首而作
詩曰

宵旰需賢表薦紳扶宗首選贊華勛官聯天府璇璣象
帝闡河圖琬琰文曾聽簫韶瞻曉日仰攀弓劍泣秋雲

小臣作頌稱仁聖湛露承恩未足云

題小薛王畫鹿

鄧文原

禮樂河間雅好儒曾陪校獵奉鑾輿畫長靈園觀遊後
政暇嘉賓燕集餘蛺蝶圖工人去久騶虞詩好化行初
宗藩翰墨留珍賞憑伏相如賦子虛

陪高彥敬游南山

鄧文原

不到南山又二年離離秋草映寒泉東林蕭散開蓮社
西晉風流棹酒船古寺雲烟終日合長松風雨半空懸

謝公未了登臨興故向禪房借榻眠

郎中蘇公哀挽

志道

鄧文原

塞垣重鎮雪雲堆畫諾人稱幙府才流馬道艱逢歲儉
涸魚民困得春回陽關猶記歌三疊杜老俄成賦八哀
夜靜燕臺山月冷祇疑化鶴一歸來

司業李公哀輓

元禮

貢奎

山立庭紳衆象觀名高真不愧儒冠文章清廟藏琛玉
勲業烏堂鎮羽翰譽重朝端知有子貧憐身後似無官

百年耆舊彫零盡展卷哀辭忍淚看

王內翰哀挽

惲

張養浩

束髮耽經晚益勤平生精力盡斯文先朝十卷今餘幾
當代三王獨數君李賀屢煩韓愈駕羊曇空阻謝安墳
玉堂寥索人何在落日淇川滿白雲

送袁待制扈從上京

虞集

日色蒼涼映赭袍時巡無乃聖躬勞天連閣道晨留輦
星散周廬夜屬橐白馬錦韉來窈窕紫駝銀甕出蒲萄

從官車騎多如雨獨有揚雄賦最高

朝迴和周待制韻

虞集

三十六竿吹鳳皇九重春色絢天光輕雲微動旌旗煖
湛露初晞草木香貝葉神師東度嶺金輿馴象北浮洋
小臣職在歌功德拜手陳詩對日長

送朱生南歸

虞集

喜子南歸盱水上經過為我問臨川幾家橘柚霜垂屋
何處蒹葭月滿船應有交游憐遠道試從父老說豐年

寒機早晚成春服一一平安報日邊

題南野亭

虞集

門外烟塵接帝局座中春色自幽亭雲橫北極知天近
日轉東華覺地靈前澗魚游留客釣上林鶯囀把杯聽
莫誇韋曲花無賴獨擅終南雨後青

歸蜀

虞集

我到成都住五日駟馬橋下春水生過江相送荷主意
還鄉不留非我情鷓鴣輕筏下溪足鸚鵡小窻呼客名

賴得郢筒酒易醉夜深銜雨漢州城

自仁壽迴成都

虞集

還鄉思速去鄉遲王事相縻散後期里父留看題壁字
山僧打送拾田碑胡桃筇竹南方要盧橘枇杷上國知
此日君親俱在望徘徊三顧欲何之

謝周南翁

虞集

使過池陽聞上日好懷浩蕩為君開江干維楫車馬集
亭上持盃風雨來通夜魚龍聽語竟明年鴛鴦憶朝迴

九華秋色翠可食為問謫仙安在哉

送李通甫赴湖南行省都事

虞集

黃鶴樓前江水春江花飛接渡江人日長青瑣文書簡
雨過滄洲杜若新應共庾公揮扇坐每尋崔顥賦詩頻
三公舊掾多為相行見迴車載繡茵

御溝詩次宋顯夫韻

虞集

御溝雪融三月初鳬鷺鴻鴈總來居蒲桃水綠可為酒
楊柳條青堪貫魚逶迤天河起箕尾滉漾雲海浮青徐

舟前花落傍飛燕隄上風來濕舞裾翠輦時留金駟裏
錦波不著玉芙蓉臨流宋玉偏能賦莫待東都客問予
試院書事

馬祖常

棘圍粉署隔重牆校藝分官屬正郎五夜風簾燒蠟燭
九天冰樹劑龍香周旋接武尚書履供帳留茵御史床
臚唱閣門春色曙侍臣應奏慶雲章

題光山縣孔宰幽風亭

馬祖常

光山近在故山西樹滿岡頭稻滿畦隣屋讀書相教授

社祠醉酒共提携
水牛礪角嫌畊少
野蠶抽絲喜價低
春雨行田無從吏
獨騎齋馬畏青泥

送宋顯夫南歸

馬祖常

琵琶溝北識君初
藉甚才華二十餘
欲賦兔園干孝邸
不因狗監進相如
瀟湘路熟逢知己
韋杜天低望故居
携幼歸來拜丘壑
南游莫戀武昌魚

駕發

馬祖常

蒼龍對闕夾天閣
秋駕凌晨出國門
十萬貔貅騎驤裏

一雙日月繡旗旂講蒐獵較黃羊圈錫宴恩沾白獸尊
赫矣漢家人物盛馬卿有賦在文園

送袁德平歸越

王士熙

平湖如鏡靜秋波禹穴西風捲碧蘿狂客有船都載酒
道人無字不籠鵝床頭舊笏青雲近窻下殘編白雪多
燕市塵深拂衣去海門何處問漁蓑

送王在中代祀秦蜀山川

王士熙

太華雲連蜀棧低柳花三月紫騮嘶香浮曉露金匳濕

旛拂春烟絳節齊策牘當年登桂苑詞林後夜趣芝泥
長安遊客應無數誰共王褒頌碧雞

題郭忠恕九成宮圖

王士熙

鐵馬歸來定太平九成宮殿暑風清龍盤古洞長藏雨
鳳入層臺自度笙畫棟塵空巢燕去蒼崖雲掩路碑橫
秦川忽向丹青見魂夢依稀識化城

驪山宮圖

王士熙

翠嶺含烟曉仗催五家車騎入朝來千峯雲散歌樓合

十月霜晴浴殿開烽火空臺留草樹荔支長路認塵埃
月中人去青山在始信昆明有劫灰

題鮮于伯幾與仇廉訪帖

王士熙

三生文采趙公子四海聲名仇使君彈琴不作廣陵散
焚香遙駐博山雲玉署春來鷺漫語繡衣人去鴈空聞

龍蛇兩紙光如玉即是安西與右軍

其帖之語曰趙公子明曰欲過寒舍

看書畫廉訪相公能一來焚香彈琴亦佳趙公子子昂也後亦有跋帖廉訪字彥中今具子公哲御史寶藏此帖

寄上都分省僚友

王士熙

天上風清暑盡消
尚方仙隊按雲韶
白鵝海水生鷹獵
紅藥山岡詐馬朝
涼入賜衣飄細葛
醉題歌扇濕輕綃
河堤楊柳休傷別
八月星槎到鵲橋

畫省薰風松樹陰
合歡花下日沉沉
腐儒無補漫獨坐
故人不來勞寸心
紫極三台光景接
洪鈞萬象歲年深
灤江回首九天上
誰傍香爐聽舜琴

題節婦

王士熙

寒窗機杼泣秋風
鏡影鉛雲不汝同
明月有光生夜白
貞松無夢妬春紅
羅襦舊繡天吳折
綠綺離弦海鶴空
陌上行人指華表
閉門踈雨落梧桐

上京次伯庸學士韻

王士熙

侍臣催講御堦西
雲靜觚稜曉色低
天闕神州卑兩漢
地連碣石轉三齊
含香畫永閑青瑣
視草堂幽濕紫泥
最憶東山老松樹
秋風應有鶴來栖

大都雜詩

宋本

拋却漁竿滄海邊
拂衣來看九重天
畫闌九陌橋如月
綠影千門樹似烟
南國佳人玉幼玉
中朝才子杜樊川
紫雲樓上如澠酒
孤負春風二十年

繡錯繁華徧九衢
上林辭賦漢西都
朱門細婢金條脫
紫禁材官玉鹿盧
萬里星辰開上界
四朝冠蓋翊皇圖
東隣白面生紈綺
笑殺揚雄卧一區

盧溝曉月墮蒼烟
十一門開日色鮮
海上神山無弱水
人間平地有鈞天
寶幢珠珞瞿曇寺
豪竹哀絲瑋瑁筵

春雨如膏三萬里盡將嵩呼祝堯年

形勢全燕擁地靈梯航萬國走王城狗屠已仕明天子
牛相寧知別太平玄武鉤陳騰王氣白麟赤鴈入新聲
近來朝報多如雨不見河南召賈生

姑蘇臺

劉致

麋鹿應知易代頻吳趨誰唱不堪聞捧心臺暗梨花月
抉目門深薜荔深江閔水犀歐冶劍氣騰金虎闔廬墳
計然已死鴟夷逝寂寞五湖西日曛

綿竹縣治

楊靜

通衢砌石蘚生鱗
三兩人家屋宇新
嚴子有祠存故里
魏公無第與比隣
傳說共說千年樹
問詒那逢百歲人
回首向來佳麗地
暮雲斜日紫巖春

燕中懷古

李源道

荆卿墓上草離離
郭隗臺邊對落暉
戰國山川秋氣壯
中原豪傑曉星稀
乾坤納納無人識
南北年年有鴈飛
說似盧溝橋畔柳
安排青眼送將歸

宗陽宮翫月

楊載

老君臺上涼如水坐看冰輪轉二更大地山河微有影
九天風露靜無聲蛟龍並起承金榜鸞鳳雙飛載玉笙
不信弱流三萬里此身今夕到蓬瀛

擬去京師

楊載

囊衣橐載道傍車人事匆匆歲欲徂風雨五更鷄亂叫
江湖千里鴈相呼蕪菁散漫根猶茁桑柘蕭條葉正枯
却上高邱重回首五雲繚繞帝王都

貢袁諸公修史

楊載

詔編國史有程期正是諸郎傑直時虎士守門宮窈窕
雞人傳箭漏遲遲窻間夜雨銷銀燭城上春雲壓綵旗
才大各稱天下士書成當繼古人為

宿李陵臺

周應極

曠野平蕪入壯懷征鞍小駐李陵臺關河萬里秋風晚
霜月一天鴻鴈來持節蘇卿真壯士開邊漢武亦多才
千年懷古無窮意且向郵亭酌酒盃

睢陽懷古

李鳳

睢陽城郭劫灰餘風景蕭條市井踈隄接汴梁分驛路
地連齊魯幾兵車張巡戰壘沙沉戟關伯提封草滿墟
珍重開元遺寺在石幢猶刻魯公書

周氏慈雲庵

揭傒斯

韓阿松柏野烟飛丞相文章入鳳池華屋青山春掩冉
浮雲流水暮逶迤哺烏時拂巖花落馴鹿長環宰樹悲
唯有慈孫禁垣裏年年南望不勝思

元文類卷七

欽定四庫全書薈要卷二萬九十一

元文類卷八

元 蘇天爵 編

五言絕句

錄汴梁宮人語

楊 奐

一入深宮裏經今十五年長因批帖子呼到御床前

其二

歲歲逢元夜金蛾開簇巾見人心自怯終是女兒身

其三

殿前輪直罷偷去賭金釵怕見黃昏月殷勤上玉階

其四

翠翹珠襖背小殿夜藏鈎驀地羊車至低頭笑不休

其五

內府頒金帛教酬賀節盤兩宮新有旨先與問孤寒

其六

人間多棗栗不到九重天長被黃衫吏花攤月賜錢

其七

仁聖生辰節君王進玉卮
壽棚兼壽表留待北還時

其八

邊奏行臺急東華夜啓封
內人催步輦不候景陽鍾

其九

畫燭雙雙引珠簾一一開
輦前齊下拜歡飲辟寒盃

其十

聖躬春閣內只道下朝遲
扶仗嬌無力紅綃貼玉肌

其十一

今日天顏喜東朝內宴開外邊農事動詔遣教坊回

其十二

駕前雙白鶴日日候朝回自送鑾輿去經年更不來

其十三

陡覺文書靜相將立夕陽傷心寧福位無復夜薰香

其十四

二后睢陽去潛身泣到明却回誰敢問校事有心情

其十五

為道圍城久，粧奩聞犒軍。
入春渾斷絕，饑苦不堪聞。

其十六

監國推梁邸，初頭靜不知。
但疑牆外笑，人有看宮時。

其十七

別殿弓刀響，倉黃接鄭王。
尚愁宮正怒，含淚強添粧。

其十八

一向傳宣喚，誰知不復還。
來時舊針線，記得在窗間。

其十九

北去遷沙漠誠心畏從行不如當日死頭白若為生

酬昭君怨

楊 奐

玉貌辭金闕貂裘擁繡鞍將軍休出戰塞上雪偏寒

春日

劉 因

游絲困無力欲起重悠揚芳草落花滿相思春晝長

石鼎聯句圖

劉 因

玩世如一鼎姓名誰得聞仙翁應自笑知我有鄒訢

螻蛄

劉因

後利前還蒞陰陽體段分不須觀兔尾即此見羲文

薔薇

劉因

色染女真黃露凝天水碧花間日月長朝暮閱兩國

采薇圖

盧摯

服藥求長年孰與孤竹子一食西山薇萬古猶不死

題張尹書巢

吳澂

食息不離書令尹非蠹魚騰身出巢外編簡不如吾

又

醯雞瓮裏天露蟬殼外身此巢何處著六合一微塵

題江州庾樓

賀復孫

宿鳥歸天盡浮雲薄暮開淮山青數點不肯過江來

錢選宮人圖

安熙

露冷月華白悠悠方寸心夫君渺何許悵望碧雲深

市莊

王結

市莊主人踏門徵詩短歌六章用塞雅命其卒章之亂

聊示莞爾之謔云躬耕之暇擊壤緩歌抱膝微吟亦足以超然于天壤間也

其一

烏府振弘規鳳閣司婉畫退食休別墅逍遙古樂國

其二

沃若成都桑爛班青門瓜隱顯亮殊途高致惟一家

其三

晨鐘趨朝班日旰遊市莊兩兒帶經鋤奕世流芬芳

其四

若人孔氏徒臺閣揚清風休日植杖耘高揖荷蓀翁

其五

城居匪湫隘桑果連畛畦吾廬有高興何必空山棲

其六

老我縛塵纓山林渺遐想羨君市有莊取魚兼熊掌

節婦黃氏

馬祖常

白日松臺閼青山石椁沉十年哭夫淚下入九泉深

過李陵臺

馬祖常

蹕林聞野祭漢室議門誅辛苦樓蘭將淒涼太史書

七言絕句

讀汝南遺事

楊 奐

軹道牽羊事已非更堪行酒着青衣裹頭婢子那知此
爭逐君王烈焰歸

六朝江水故依然隔斷中原又百年長笑桓溫無遠畧
竟留王猛佐苻堅

明皇擊梧圖

李俊民

不使梨園弟子知
太平音在鳳凰枝
一朝野鹿嘶花去
長憾秋風葉落時

過陳司諫墓

劉祁

鸞坡烏府舊遊空
三尺孤墳野寺中
猶有憂時心不死
墓門昨夜起秋風

瀟湘夜雨

李治

遠寺孤舟墮渺茫
雨聲一夜滿瀟湘
黃陵渡口風波暗

多少征人說故鄉

墨海棠

李治

漢宮愁絕冷裊枝一醺劉郎兩鬢絲
甲帳夜寒銀燭短
六銖雲帔獨來時

征南口號

杜瑛

春早雲南麥已黃
瀘江蒸霧水如湯
馬蹄半帶陰山雪
變作人天六月涼

春日雜詠

圖克坦公履

東風簾幕半塵埃
歌舞臺空畫不開
試問雙飛新燕子
今年社日爲誰來

登北邙山

楊果

干戈叢裏過壬辰
原上纍纍冢墓新
寒食清明幾家哭
問來都是陣亡人

魏家池館姚家宅
佳卉而今採作薪
水北水南二三月
舊時多少看花人

村居

楊果

草堂有燕賀新成沙渚無鷗續舊盟滿徑落紅風掃靜
一渠春碧雨添平

春波淡淡捲寒漪長日蕭蕭靜竹扉村舍蠶催桑葉大
山田鹿食麥苗稀

峴山秋晚圖

楊果

江水江花遶大堤太平歌舞習家池而今風景那堪畫
落日空城鳥雀悲

太真教鸚鵡圖

馮謂

溫泉賜浴意融怡
猶念寧王玉笛吹
却怕能言泄幽事
丁寧慎勿語人知

覃懷春日

趙復

江南江北半浮生
蹤跡居然水上萍
竹鷄啼罷山雨黑
鷲子生時桑柘青

春晴

劉辰翁

江柳長天草色齊
新晴何物不芳菲
無因化作千胡蝶
西蜀東吳款款歸

新燕池塘綠雨肥
初晴未暖日光微
角巾猶帶花梢濕
纔倚闌干見絮飛

春浦帆歸圖

孟攀鱗

涵空水色碧於苔
照眼山光翠作堆
疑是桃花源上客
輕舟天外得春來

杭州聞角

梁棟

聽徹哀吟獨倚樓
碧天無際思悠悠
誰知盡是中原恨
吹到江南第一州

有懷

劉東忠

雨過幽庭長綠苔
東風時為掃塵埃
無人曾見春來處
門外桃花只自開

風雨圖

許衡

南山已見霧昏昏
便合潛身不出門
直到半途風雨橫
倉皇何處覓前村

風雨迴舟

張孔孫

風雨來時撥棹迴
濟川心事有誰知
停舟且做江湖夢

浪靜風恬未是遲

水仙花

商挺

海上三山壁月明
人間誰識許飛瓊
秋風吹上青鸞背
來散天香與素英

明月珠衣翡翠裳
冰肌玉骨自清涼
不隨王母瑤池去
來侍維摩病几傍

書事

劉因

當年一線魏瓠穿
直到橫流破國年
草滿金陵誰種下

天津橋畔聽啼鵲

卧榻而今又屬誰
江南回首見旌旗
路人遙指降王道
好似周家七歲兒

朱張遺學有經綸
不是清談誤世人
白首歸來會同館
儒冠爭看宋師臣

風節南朝若不伸
沂流直要到崑崙
世宗一死千年欠
此是黃河最上源

唱徹芙蓉花正開
新聲又聽采茶哀
秋風葉落踏歌起

已覺江南席卷來

山寺早起

劉因

松窗一夜遠潮生
斷送幽人睡失明
夢覺不知春已去
半簾紅雨落無聲

讀史評

劉因

紀錄紛紛已失真
語言輕重在詞臣
若將文字論心術
恐有無邊受屈人

山行

劉因

西崦人家竹映溪山深雨暗到來遲行窮谷口水才見
流盡巖花春不知

山家

劉因

馬蹄踏水亂明霞醉袖迎風受落花怪見溪童出門望
鵲聲先我到山家

寫真詩卷

劉因

龍祠獄廟盡冠巾雨露何關土木身不是一程窮物理
誰從一髮辨天真

已巳春往均州

宋 衛

武當却立翠屏新
碧玉溶溶漢水奔
如畫江山千古在
城闌幾度戰塵昏

觀出獵

宋 衛

金鉞染血犬銜毛
倒臂蒼鷹掣錦綵
紅日下山秋塞濶
齊歌野樂陣雲高

平原馬首鴈行齊
狡兔深藏鳥不飛
環立傳觴人半醉
斜欹貂帽雪中歸

壽陽梅粧圖 錢選畫

王思廉

一聲白鴈渡江潮
便覺金陵王氣銷
畫史不知亡國恨
猶將鉛粉記前朝

昭君出塞圖

王思廉

黃沙堆雪暗龍庭
馬上琵琶掩淚聽
漢室禦戎無上策
錯教紅粉怨丹青

汾亭古意圖

張璪

漢家宮闕白雲秋
魏國川原過雁愁
萬古松風一茅舍

不隨華屋變山丘

關山風雨圖

張礎

山氣凝寒雨不開
江濤拍岸雪成堆
漁翁慣識風波惡
天際孤舟已早迴

絕句四首

趙孟頫

春寒惻惻掩重門
金鴨香殘火尚溫
燕子不來花又落
一庭風雨自黃昏

湘簾細織浪紋稀
白苧新裁暑氣微
庭院日長賓客退

滿池芳草燕交飛

搖落山川草樹稀
白雲時逐鴈南飛
苦無綠酒酬佳日
猶有黃花媚夕暉

梅花半落雪飄零
楊柳青青江水生
一夜東風吹鴈過
江南江北總多情

錢選畫花

陳巖

雪翁夙號老詞客
亂後却工花寫生
寓意豈求顏色似
錢塘風物記昇平

題道院

高克恭

綠陰無際壓蒼苔，為愛幽深手自栽。
風月早知煩耳目，不教春筍過牆來。

草色琅玕逼兩楹，蚤陰才過午陰清。
斜陽又送西軒影，一枕移床待月生。

無錫山中留題

高克恭

山深自昔無車馬，道在何曾畏虎狼。
祇恐閑人來看竹，淋漓醉墨污新牆。

即事

高克恭

古木陰中生白烟忽從石上見流泉閒隨屈曲尋源去
直到人家竹塢邊

過弋陽

高克恭

雷聲驅雨過山西山腹雲眼似削齊日暮牧兒歸不得
料應白水漲前溪

過信州

高克恭

二千里地佳山水無數海棠官道傍風送落紅攬馬過

春光更比路人忙

過京口

高克恭

北來朋友不如鴻幾個西飛幾個東多少登臨舊臺觀
闌干閒在夕陽中

寄王總管

李昶

華陽東下古梁州五馬旌旗擁上游腸斷寒江衣帶水
令人空望鎮南樓

過故縣壩

李昶

憲宗皇帝射臺高氣壓蠻江萬丈濤玉輦不歸巖樹冷
白雲何處醉蟠桃

杏花始開小酌

安熙

生紅和露滴胭脂又到芳春寂寞時便擬提壺花下醉
却愁羞殺背陰枝

杖藜吟逸去還來收拾春光入酒盃自是風花要題品
等閒蜂蝶莫相猜

和郭安道治書韻

周馳

西風吹起白頭波
半夜扁舟掠岸過
不向長橋沽一醉
滿天明月奈秋何

君醉淋漓我浩歌
古人為恨復如何
秋來幾日渾無賴
已有新霜著芰荷

江間小艇數能乘
活計今如船子僧
近喜老妻能斫膾
欲令稚子學扳罾

久客思歸歸未能
題書附與遠遊僧
吳松江上鱸魚美
尙處人家不下罾

遼陽高節婦

王結

天東長白近蓬瀛
縹緲仙人玉雪清
鳳去紫簫聲已絕
青鸞獨跨上瑤京

秋懷

曹元用

沙磧秋高宛馬肥
哀笳一曲塞雲飛
南都兒輩應相念
過盡征鴻猶未歸

贈李祕監

至治間曾
高御客

張養浩

封章曾拜殿庭間
凜凜丰儀肅九關
回首橋山淚成血

逢君不忍問龍顏

青山白雲圖

虞集

獨向山中訪隱君
行窮千澗水
沄沄仙家更在空青外
只許人間禮白雲

水芙蓉

虞集

長洲宮沼醉西施
蕩漾蘭舟不自持
願奉君王千歲樂
一盤清露玉淋漓

木芙蓉

虞集

九月襄王燕渚宮
霓旌翠羽度雲中
滿汀山雨衣裳濕
宋玉愁多賦未工

春雲

虞集

春雲冉冉度宮城
樓雪初融水半生
行過御溝還久立
舉頭枝上有啼鶯

雨裏輕塵道半乾
朝迴隨處借花看
牆東千樹垂楊柳
飛絮時來近馬鞍

聽雨

虞集

屏風圍煖鬢參參絳蠟搖光照暮酣京國多年情盡改
忽聽春雨憶江南

何處它年寄此生山中江上總關情無端繞屋長松樹
盡把風聲作雨聲

庚午廷試次韻

虞集

待漏宮門聽鑰開袖中進卷總賢才奏名殿裏千花合
傳勅階前好雨來

千花覆檻柳垂絲晝刻傳呼淑景移聖主自觀新進策

侍臣簪筆立多時

曹將軍馬

虞集

高秋風起玉關西
踣鐵歸朝十萬蹄
貌得當時第一足
昭陵風雨夜聞嘶

寄家書

馬祖常

春雲閣雨花泥少
池上波平飛白鳥
蘄中河外盡天涯
蓮葉圓時身到家

題柳道傳詩卷

馬祖常

九曲珠穿蟻度絲雙環鏡透月輪虧人間自有鸛鷺侶
早奏簫韶見鳳儀

宮詞

馬祖常

華清水殿繡芙蓉金鴨香銷寶帳重竹葉羊車來別院
何人空聽景陽鍾

銀床井冷露漙漙半臂薰衣釧辟寒不恨長門冬夜永
小奴休報鞦羅單

長門月轉漏聲催自熨寒衣減帶圍休怕官家嫌體弱

細腰曾是楚王妃

合宮丹泛濯龍池
端午爭懸百綵絲
綵絲新賜承恩脂
粉磴上陽不敢妬蛾眉

繭館綵絲濕翠翹
夫人纖指織龍綃
羅襦雙珮清晨響
只恐君王有晏朝

八姨粉翠錫千緡
脂盃新粧百寶勻
白髮上陽宮女老
補衣重折繡麒麟

卯酒微微解宿醒
催花羯鼓報新聲
君王好錫承恩宴

辛苦邊頭百將營

露蘭研粉壽陽粧
奩內新燒百刻香
圓舌教成鸚鵡語
偷將玉笛送寧王

銀河七夕渡雙星
桐樹逢秋葉未零
萬歲君王當寧坐
妾身不願命如萍

花氣蒸霞淑景明
望仙樓上看彈鸞
李暮吹笛宮牆外
學得梨園第一聲

孟光舉案圖

王執謙

金夕日人二
卷八
白髮梁鴻與世乖
賴逢光也配其才
五噫歌罷愁無奈
不覺春從案上來

題甄氏訪山亭

陳觀

水流花落石生雲
日靜風喧草欲薰
老去風流猶未減
一丘一壑要平分

雨後西山翡翠堆
結亭直欲近巖隈
從今記取溪頭路
一日須來一百迴

清明日遊太傅林亭

辛文房

隔水園林丞相宅
路人猶記種花時
可憐總被風吹盡
不許遊人折一枝

玉簪

張淳


開軒俯瞰碧雲衢
白筆含香半吐鬚
帶露折來何處可
膽瓶秋水澹如無

過郝參政墓

鮑仲華

茂林喬梓上干雲
葉曾沾雨露恩
萬古西山青不斷
鳥啼花落幾黃昏

元文類卷八



總校官候補中允臣王燕緒

校對官編修臣許兆椿

謄錄監生臣應先烈

欽定四庫全書薈要

集部

元文類卷九至
十二

詳校官候選知縣臣吳蜀華



欽定四庫全書薈要卷二萬九十二

元文類卷九

元 蘇天爵 編



即位詔
庚申年四月

王 鶚

朕惟祖宗肇造區宇奄有四方武功迭興文治多闕五十餘年於此矣蓋時有先後事有緩急天下大業非一聖一朝所能兼備也先皇帝即位之初風飛雷厲將大

有為憂國愛民之心雖切於已尊賢使能之道未得其人方董夔門之師遽遺鼎湖之泣豈其餘恨竟弗克終肆予沖人渡江之後蓋將深入焉乃聞國中重以僉軍之擾黎庶驚駭若不能一朝居者予為此懼駟騎馳歸目前之急雖紓境外之兵未戢乃會羣議以集良規不意宗盟輒先推戴左右萬里名王巨僚不召而來者有之不謀而同者皆是咸謂國家之大統不可以曠神人之重寄不可暫虛求之今日太祖嫡孫中先皇母弟之

列以賢以長止予一人雖在征伐之間每存仁愛之念
博施濟衆實可為天下主天道助順人謨與能祖訓傳
國大典於是乎在孰敢不從朕峻辭固讓至於再三祈
懇益堅誓以死請於是俯徇輿情勉登大寶自惟寡昧
屬時多艱若涉淵冰固知攸濟爰當臨御之始宜新弘
遠之規祖述變通正在今日務施實德不尚虛文雖平
成未易遽臻而饑渴所當先務畧舉其切時便民者條
列於后嗚呼歷數攸歸欽應上天之命勲親斯託敢忘

烈祖之規建極體元與民更始朕所不逮更賴我遠近
宗族中外文武同心協力獻可替否之助也誕告多方
體予至意

中統建元詔

王 鶚

祖宗以神武定四方淳德率羣下朝廷草創未遑潤色
之文政事變通漸有綱維之目朕獲縉舊服載擴丕圖稽
列聖之洪規講前代之定制建元表歲示人君萬世之
傳紀時書王見天下一家之義法春秋之正始體大易

之乾元炳煥皇猷權輿治道可自庚申年五月十九
日建號為中統元年惟即位體元之始必立經陳紀為
先故內立都省以總權綱外設總司以平庶政仍以興
利除害之事補偏救弊之方隨詔以頒申畫於后於戲
秉籙握樞必因時而建號施仁發政期與物以更新敷
宣懇惻之詞表著憂勞之意凡在臣庶體予至懷

中統元年五月赦

王鶚

我國家烈祖肇基先皇繼統惟圖日闢於疆宇未免歲

懼於兵威事有當為時難遽已朕獲承丕祚已降德音
念士卒暴露者久之而人民離散者多矣干戈載戢田
里俾安不期同氣之中俄有閼牆之侮顧其冲幼敢啓
茲謀皆被姦讒相濟以惡彼既階於禍亂此當應以師
徒朕惟父母兄弟之親宗廟社稷之重遣使敦諭至于
再三亂紀執迷曾無少革以致宗族共怒戈甲乃興重
念兵方弭而復徵民甫休而再擾危疑未釋反側不安
詿誤者至及於無辜拘囚者或生於不測非朕本意盡

然傷心宜推曠蕩之恩普示哀矜之意於戲懷心或啓
忍加管蔡之刑內難旣平迂續成康之治

賜高麗國王歷日詔

中統五年正月

王 鶚

諭高麗國王植獻歲發春式邁三陽之會對時育物宜
同一視之仁瞻爾外邦忠於內附肇用正旦庸展賀儀
方使价之還歸須筴書之播告今賜卿中統五年歷日
一道卿其若稽古典敬授民時勸彼東隅之氓勤於南
畝之事茂迎和氣迄用康年時乃之休惟朕以懌

至元改元赦

中統五年八月

王鶚

應天者惟以至誠拯民者莫如實惠朕以菲德獲承慶
基內難未戢外兵復戢夫豈一日于今五年賴天地之
畀矜暨祖宗之垂裕凡我同氣會於上都雖此日之小
康敢朕心之少肆比者星芒示儆雨澤愆常皆闕政之
所由顧斯民其何罪宣布維新之令溥施在宥之仁於
戲否往泰來迓續亨嘉之會鼎新革故正資輔弼之良

建國號詔

至元八年十一月

圖克坦公履

誕膺景命奄四海以宅尊必有美名紹百王而紀統肇
從隆古匪獨我家且唐之為言蕩也堯以之而著稱虞
之為言樂也舜因之而作號馴至禹興而湯造互名夏
大以殷中世降以還事殊非古雖承時而有國不以義
而制稱為秦為漢者蓋從起初之地名曰隋曰唐者又
即始封之爵邑是皆徇百姓見聞之狃習要一時經制
之權宜槩以至公得無少貶我太祖聖武皇帝握乾符
而起朔土以神武而膺帝圖四振天聲大恢土宇輿圖

之廣歷古所無頃者耆宿詣庭奏章申請謂既成於大業宜早定於鴻名在古制以當然於朕心乎何有可建國號曰大元蓋取易經乾元之義茲大治流形於庶品孰名資始之功予一人底寧於萬邦尤切體仁之要事從因草道協天人於戲稱義而名故匪為之濫美乎休惟永尚不負於投艱嘉與敷天共隆大號

頒授時歷詔

至元十七年六月

李謙

自古有國牧民之君必以欽天授時為立治之本黃帝

堯舜以至三代莫不皆然為日官者皆世守其業隨時
考驗以與天合故歷法無數更之弊及秦滅先聖之術
每置閏于歲終古法益殫廢矣由兩漢而下立積年月
法以為推步之準因仍沿襲以迄於今夫天運流行不
息而欲以一定之法拘之未有久而不差之理差而必
改其勢有不得不然者今命太史院作靈臺制儀象日
測月驗以考其度數之真積年月法皆所不取庶幾昭
合天運而永終無弊乃者新歷告成賜名曰授時歷自

至元十八年正月一日頒行布告遐邇咸使聞知

清冗職詔

至元二十三年七月

李謙

惟我祖宗肇造區夏雖中書已嘗建立而官制未暇舉行迨予圖大以宅中思欲繼志而述事集儒臣之公議法前代之彛章爰立省部院臺以正朝廷綱紀自疆土極照臨之遠而省臺有內外之分日益月增官冗人濫嘗勅有司而澄汰意能舊制之遵承比聞近侍之言謂益曩時之弊彼不勝重任有壅上聞苟尚蹈匪彛時惟

予咎其清冗職用復前規於戲官不必備惟其人朕恪
守已成之憲爾尚克勤於乃事卿永肩圖報之心

加封五嶽四瀆四海詔

至元二十八年二月

閻復

朕惟名山大川國之秩祀今嶽瀆四海皆在封宇之內
民物阜康時惟神休而封號未加無以昭答靈貺可加
上東嶽為齊天大生仁聖帝南嶽司天大化昭聖帝西
嶽金天大利順聖帝北嶽安天大貞元聖帝中嶽中天
大寧崇聖帝加封江瀆為廣源順濟王河瀆靈源弘濟

王淮瀆長源溥濟王濟瀆清源善濟王東海為廣德靈
會王南海廣利靈孚王西海廣潤靈通王北海廣澤靈
佑王仍各遣官詣祠致告以稱朕敬恭神明之意

興師征江南諭行省官軍詔

王 構

爰自太祖皇帝以來彼宋與我使介交通殆非一次彼
此曲直之事亦所共知不必歷舉迨我憲宗之世朕以
藩職奉命南伐師次鄂渚彼賈似道遣宋京詣我近臣
博都歡前河南路經畧使趙璧請罷兵息民願奉歲幣

於我朕以國之大事宗親在上必須入計用報而還即位之始追憶是言乃命翰林侍講學士郝經等奉書往聘蓋為生靈之計也古者兵交使在其間惟和與戰宜嗣報音其何與於使哉而乃執之卒不復命至如留此一二行李於此何損於彼何益以致師出連年邊境之間死傷相藉係累相屬皆彼宋自禍其民也襄陽被圍五年屢拒王師義當不貸朕先有成命果能出降許以不死是既降附之後朕不食言悉全其命冀宋悔過或

啓令圖而乃迷軌罔有悛心所以問罪之師有不能已者今遣爾等水陸並進爾等當布告遐邇夫以天下爲事爰及干戈自古有之無辜之民初無與焉若彼界軍民官吏人等去逆效順與衆來降或別立奇功者驗等第官資遷擢其所附軍民宜嚴飭將士毋得妄行殺掠父母妻孥家口毋致分散仍加賑給令得存濟其或固拒弗從及迎敵者俘戮何疑

即位詔

至元三十一年四月

王楙

朕惟太祖聖武皇帝受天明命肇造區夏聖聖相承光
熙前緒迨我先皇帝體元居正以來然後典章文物大
備臨御三十五年薄海內外罔不臣屬宏規遠畧厚澤
深仁有以衍皇元萬世無疆之祚我昭考早正儲位德
盛功隆天不假年四海觖望顧惟眇質仰荷先皇帝殊
眷往歲之夏親授皇太子寶付以撫軍之任今春宮車
遠馭奄棄臣民乃有宗藩昆弟之賢戚畹官僚之舊謂
祖訓不可以違神器不可以曠體承先皇帝夙昔付託

之意合辭推戴誠切意堅朕勉徇所請於四月十四日
即皇帝位尚念先朝庶政悉有成規惟慎奉行罔敢失
墜更賴宗親勲戚左右忠良各盡乃誠以輔台德

五鎮山加封詔

大德三年

王構

朕惟九州之有鎮山三代以為常祀嶽瀆四海加封爰
自於先朝疆理羣方同饗宜遵於舊制乃眷粹靈之懿
其增號秩之華今加上東鎮沂山曰元德東安王南鎮
會稽山曰昭德順應王西鎮吳山曰成德永靖王北鎮

暨巫閭山曰貞德廣寧王中鎮霍山曰崇德應靈王地
德恒奄功協成於安奠民生咸阜治浸格於隆平仍命
所在有司以時致祭務盡精嚴尚冀歆承益孚嘉貺

建儲詔

大德九年六月

閭復

惟我太祖聖武皇帝世祖聖德神功文武皇帝規模宏
遠預建儲嗣式與古合朕恪遵祖宗成憲允協昆弟僉
言立嫡子德壽為皇子茲有日矣比者遠近宗親復以
為請又中書百司及諸老臣請授冊寶昭示中外朕俯

從衆願於今日五日授以皇太子寶所有冊禮其如常制屬茲盛舉宣布新恩於戲慶衍無疆既正名於國本仁同一視尚均福於黎元

即位詔

大德十一年五月

閻復

昔我太祖皇帝以武功定天下世祖皇帝以文德洽海內列聖相承丕衍無疆之祚朕自先朝肅將天威撫軍朔方殆將十年親御甲冑力戰却敵者屢矣方諸蕃內附邊事以寧遽聞宮車晏駕乃有宗室諸王貴戚元勳

相與定策於和林咸以朕為世祖曾孫之嫡裕皇正派
之傳以功以賢宜膺大寶朕謙讓未遑至于再三還至
上都宗親大臣復請于朕間者姦臣乘隙謀為不軌賴
祖宗之靈母弟愛育勗拔力八達稟命太后恭行天罰
內難既平神器不可久虛宗祧不可乏祀合辭勸進誠
意益堅朕勉徇輿情於五月二十一日即皇帝位任大
守重若涉淵冰屬嗣服之云初其與民而更始於戲丕
承丕顯敢忘持守之心于蕃于宣勉效忠勤之力共毗

新政事底隆平

行銅錢詔

至大二年十月

姚燧

錢幣之法其來遠矣三代以降沿革不常世祖皇帝建元之初頒行交鈔以權民用已有錢幣兼行之意蓋錢以權物鈔以權錢子母相資信而有證今鈔法一新期於公私兩利重惟經久之計必復鼓鑄之規

至大三年十月赦

姚燧

朕自嗣守丕基致孝太室奉上玉冊寶加謚太祖為法

天啓運聖武皇帝光獻翼聖皇后睿宗仁孝景襄皇帝
顯懿莊聖皇后世祖聖德神功文武皇帝昭睿順聖皇
后裕宗文惠明孝皇帝徽仁裕聖皇后順宗昭聖衍孝
皇帝成宗欽明廣孝皇帝貞慈靜懿皇后于斯之時宜
降德音誕告天下猶恐數赦或賊良民今因西北叛王
不受正朔五十餘年其子徹伯爾蓋愆前人盡率部衆
歸命闕庭及庫庫楚謀為非覲未忍置理刑以輕典與
夫崇建大刹上為列聖報德冥冥下為生民祁福昭昭

者亦既成功皆我聖母之德之致已於此月五日奉玉冊玉寶上尊號曰儀天興聖慈仁昭懿壽元聖太后屬大慶禮成宜敷渙號以新民聽於戲凡在有司一乃心力以輔予治期底隆平

即位詔

至大四
年三月

姚燧

惟昔先帝事皇太后撫朕眇躬孝友天至由朕同託順考遺體重以母弟之嫡加有削平內難之功於其踐祚曾未踰月授以皇太子寶領中書令樞密使百揆機務

聽所總裁于今五年先帝奄棄天下勲戚元老咸謂大
寶之繩既有成命非與前聖寶天而始徵集宗親議所
宜立者比當稽周漢晉唐故事即正宸極朕以國恤方
新誠有未忍是用經時今則上奉皇太后勉進之命下
徇諸王勸戴之勤三月十八日於大都大明殿即皇帝
位凡尚書省誤國之臣先已伏誅同惡之徒亦已殛放
百司庶政悉歸中書命丞相特們德爾平章政事諤勒哲
李道復等縱考古治其可為今法程拯民急者具如左

方於戲凡爾有官君子皆古所謂治天職食天祿者宜
一心力欽乃攸司無替朕命

行科舉詔

皇慶二年
十一月

程鉅夫

惟我祖宗以神武定天下世祖皇帝設官分職徵用儒
雅崇學校為育才之地議科舉為取士之方規模宏遠
矣朕以眇躬獲承丕祚繼志述事祖訓是式若稽三代
以來取士各有科目要其本末舉人宜以德行為首試
藝則以經術為先詞章次之浮華過實朕所不取爰命

中書參酌古今定其條制其以皇慶三年八月天下郡縣舉其賢者能者充賦有司次年二月會試京師中選者朕將親策焉於戲經明行修庶得真儒之用風移俗易益臻至治之隆

即位詔

延祐七年三月

張士觀

洪惟太祖皇帝膺期撫運肇開帝業世祖皇帝神機睿畧統一四海以聖繼聖迨我先皇帝至仁厚德涵濡羣生君臨萬國十年於茲以社稷之遠圖定天下之大本

協謀宗親授予冊寶方春宮之與政遽昭考之賓天諸
王貴屬元勲碩輔咸謂朕宜體先皇帝付託之重皇太
后擁佑之慈既深繫于人心詎可虛於神器合詞勸進
誠意交孚乃於三月十一日即皇帝位於大明殿誕受
維新之命廣推在宥之恩尚念祖宗丕緒持守維艱萬
幾之繁罔敢暇逸更賴遠邇勲戚左右臣鄰咸一乃心
以輔予治

至治改元詔

元明善

朕祇適詒謀獲承丕緒念付託之維重顧繼述之敢忘
爰以延祐七年十二月初二日被服袞冕恭詣于太廟
既大禮之告成宜普天之均慶屬茲逾歲用易紀元于
以導天地之至和予以法春秋之謹始可改延祐八年
為至治元年於戲奉先思孝式昭報本之誠發政施仁
聿廣錫民之福

命拜珠為右丞相詔

至治二年十二月

袁 楠

帝王之職在論一相予以表正百司綱領庶績朕纘承

丕緒厲精圖治然而澤有所未洽政有所未舉豈委任之道有遺闕歟今特命中書左丞相拜珠為開府儀同三司上柱國錄軍國重事中書右丞相監修國史一新機務使邪正異途海寓乂寧以復中統至元之治於戲朝廷既正著端本澄源之功風俗斯醇廣摩義漸仁之化

諭安南國詔

曹元用

諭安南國世子陳日煥我國家誕膺景命撫綏萬邦德

澤普加靡間夷夏乃者先朝奄棄臣民朕以裕皇嫡孫
為宗戚大臣之所推戴爰自太祖皇帝肇基之地入承
天叙於至治三年九月四日即皇帝位遂以甲子歲為
泰定元年今遣亞中大夫吏部尚書馬合謀奉議大夫
禮部郎中楊宗瑞賁詔往諭爾國賜爾授時歷一帙惟乃祖
乃父修貢內附有年矣我國家遇卿甚厚頃以占城
守臣上表稱卿之邊吏累發兵相侵朕為之惻然于中
不知卿何為至是豈信然耶朕君臨天下視遠猶邇務

寧輯其民俾各得其所卿其體予至懷戒飭士衆慎保
又民俾毋忘爾累世忠順之意

即位改元詔

虞集

洪惟我太祖皇帝肇造區夏世祖皇帝混一海宇爰立
定制以一統緒宗親各授分地勿敢妄生覬覦此不易
之成規萬世所共守者也世祖皇帝之後成宗皇帝武
宗皇帝仁宗皇帝英宗皇帝以公天下之心以次相傳
宗王貴戚咸遵祖訓至於晉邸具有盟書願守藩服而

與賊臣特克實額森特穆爾等潛通陰謀冒干寶位使英
皇不幸罹于大故朕兄弟播越南北備歷艱險臨御之
事豈獲與聞朕以叔父之故順承惟謹于今六年災異
迭見權臣道拉實譟卜都拉等專擅自用疏遠勲舊廢
棄忠良變亂祖宗法度空府庫以私其黨類大行上賓
利于立幼顯握國柄用成其姦宗王大臣以宗社之重
統緒之正協謀推戴屬于眇躬朕以菲德宜俟大兄固
讓再三宗戚將相百僚耆老以為神器不可以久虛天

下不可以無主周王遼隔朔漠民庶惶惶已及三月誠懇迫切朕姑從其請謹俟大兄之至以遂朕固讓之心已於致和元年九月十三日即皇帝位於大明殿其以致和元年為天歷元年可大赦天下於戲朕豈有意於天下哉重念祖宗開創之艱恐墮大業是以勉徇輿情尚賴爾中外文武臣僚協心相予輯寧億兆以成治功

即位詔

天歷二年八月十五日

虞集

惟昔上天啓我太祖皇帝肇造帝業列聖相承世祖皇

帝既大一統即建儲貳而我裕皇天不假年成宗入繼
才十餘載我皇考武宗皇帝歸膺大寶克享天心志存
不私以仁厚居東宮遂嗣宸極甫及英年降割我家晉
邸違盟構逆據有神器天示譴告竟隕厥身於是宗戚
舊臣協謀以舉義正名以討罪揆諸統緒屬在眇躬朕
興念大兄播遷沙漠以賢以長歷數宜歸力距羣言至
予再四乃曰艱難之際天位久虛則衆志弗固恐隳大
業朕雖從請而臨御秉初志之不移是以固讓之詔始

頌奉迎之使已遣尋命喇特納實哩雅克特穆爾奉皇

帝寶璽遠迓于途受寶即位之日即遣使授朕皇太子

寶朕幸釋重負實獲素心乃率臣民北迎大駕而先皇

帝跋涉山川蒙犯霜雪道里遼遠自春徂秋懷艱阻于

歷年望都邑而增感徒御勿慎屢興節宣信使往來相

望于道路彼此思見交切于中懷八月一日大駕次翁

果察圖朕欲瞻對之有期獨兼程而先進相見之頃悲

喜交集何數日之間而宮車弗駕國家多難遽至於此

念之痛心以夜繼旦諸王大臣以為祖宗基業之隆先
帝付託之重天命所在誠不可違請即正位以安九有
朕以先皇帝奄棄方新摧怛何忍銜哀辭對固請彌堅
執誼伏闕者三日皆宗社大計乃以八月十五日即皇
帝位于上都大赦天下於戲戡定之餘莫急乎與民
休息丕變之道莫大乎使民知義亦惟爾中外大小之
臣各寃乃心以稱朕意

親祀南郊詔

至順元年
十二月

虞集

朕膺昊天之感命承聖祖之貽謀祇續丕基于今三載
統萬幾之兢業思兆姓之雍熙式舉禮文聿嚴報祀爰
以今年十月初四日躬服袞冕致明禋于南郊尊我太
祖法天啓運聖武皇帝配享上帝方至誠之孚格嘉景
貺之旋臻宜施曠蕩之恩用洽溥天之慶於戲永言配
命克肩昭事之心一視同仁益廣鴻寧之福

即位詔

虞集

洪惟太祖皇帝啓闢疆宇世祖皇帝統壹萬方列聖相

承法度明著我庫魯克皇帝入纂大統修舉庶政動合成
法授大寶位于布延圖皇帝以及格根皇帝厯數之歸
實當在我瑚土克圖皇帝濟雅圖皇帝而各播越遼遠時
則有若雅克特穆爾建義效忠戡平內難以定邦國協恭
推戴濟雅圖皇帝登位之始即以讓兄之詔明告天下
隨奉璽紱遠迓瑚土克圖皇帝朔方言旋奄棄臣庶濟雅
圖皇帝薦正宸極仁義之至視民如傷恩澤霽霈無間
遠邇顧育眇躬尤篤慈愛賓天之日皇后傳濟雅圖皇

帝顧命於太師太平王右丞相達爾罕雅克特穆爾太保
浚寧王知樞密院事巴延等謂聖體彌留益推固讓之
初志以宗社之重屬諸太兄瑚土克圖皇帝之世嫡乃遣
使召諸王宗親以十月一日來會大都與宗王大臣同
奉遺詔揆諸成憲宜御神器以至順三年十月初四日
即皇帝位于大明殿可大赦天下於戲肆予沖人託于
天下臣民之上任大守重若涉淵冰尚賴宗王大臣百
司庶府交修乃職思盡厥忠嘉與億兆之民共保隆平

之治

元文類卷九